

Malaysia bantu anjur . pertemuan Filipina-MILF

UM 29 MAR 2001

MANILA 28 Mac — Malaysia telah membantu menganjurkan pertemuan penting antara para pegawai Filipina dan Barisan Pembebasan Islam Moro (MILF) yang membawa kepada persetujuan untuk menyambung rundingan damai.

Presiden Filipina, Gloria Macapagal Arroyo memuji Perdana Menteri Datuk Seri Dr. Mahathir Mohamad kerana menyelaraskan rundingan di Kuala Lumpur antara MILF dengan para pegawai Filipina di Kuala Lumpur.

Beliau berkata, rundingan damai antara MILF dan kerajaan akan diadakan di tempat yang dipersetujui bersama.

Arroyo menyifatkan perjanjian untuk memulakan rundingan itu sebagai satu 'kejayaan besar' dalam usaha menamatkan pertempuran sejak beberapa dekad lalu di Mindanao.

Menurutnya, pejuang MILF telah bersetuju untuk mengisytiharkan gencatan senjata bagi membolehkan rundingan damai dimulakan dalam tempoh

tiga bulan.

Arroyo berkata, pejuang MILF telah bersetuju untuk menangguk serangan dan membentuk panel rundingan mereka.

Eduardo Ermita, yang mewakili kerajaan Filipina dalam pertemuan di Kuala Lumpur, berkata, Malaysia telah membantu mengatur rundingan serta menghantar pemerhatiannya pada rundingan yang diadakan Sabtu lalu.

Para pegawai Filipina dan MILF berkata, peranan penting yang dimainkan oleh Malaysia telah menjadikannya sebagai lokasi rundingan yang diadualkan.

"Satu perjanjian telah dicapai berikutan kejayaan kami mengadakan rundingan itu," Ermita memberitahu stesen radio DZRH dari Kuala Lumpur.

Ermita berkata, pasukan

MILF dalam rundingan di Kuala Lumpur telah diwakili oleh Naib Pengerusinya, Al Haj Murad, yang tidak kelihatan di hadapan umum sejak tentera Filipina melancarkan serangan besar-besaran pada tahun lalu.

Perjanjian dengan MILF itu adalah antara dua perkembangan utama yang diumumkan oleh Arroyo semalam dalam usahanya menyambung semula rundingan damai dengan MILF dan pemberontak komunis.

Arroyo juga telah bersetuju untuk mengadakan rundingan dengan pemberontak komunis di sebuah negara asing.

Para pegawai Filipina telah mencadangkan kepada beliau supaya rundingan dengan pemberontak komunis diadakan di sebuah negara Scandinavia. — AP